


清淨毘尼方廣經

二百七
作四

48830



元孫九子
重倍
輪
轉
院
書

上海圖書館藏



清淨毗尼方廣經四

姚秦三藏法師鳩摩羅什譯

如是我聞一時佛住王舍城祇闍崛山與大比丘僧八千人俱菩薩摩訶薩萬二千人及欲色界天淨居天子亦時世尊與諸無量百千大衆恭敬圍遶而演說法時有天子名寂調伏音來在會座是時寂調伏音天子從座而起偏袒右肩右膝著地合掌向佛白世尊言是文殊師利爲住何處今此大衆渴仰欲見是善丈夫從其聞法如是問已佛告彼寂調伏音天子東方過此十千佛土彼有佛國名曰寶王是中有佛号曰寶相如來應正遍覺

現在說法。文殊師利住在彼土。為諸菩薩摩訶薩而轉說法。時彼天子白。世尊。言。惟願現相。令文殊師利來詣此土。何以故。世尊。若從一切聲聞緣覺有所聞法。不如從文殊師利所聞法也。惟除如來其餘說法。無有勝者。文殊師利。若演說法。一切魔宮。皆悉闇蔽。一切眾魔。悉能摧伏。去增上慢。住滅上慢。若有未發菩提心者。發菩提心已。發心者。住不退轉。可攝者。攝可捨者。捨。順如來欲。令正法久住。尔時世尊。知寂調伏音天子心已。放白毫蔽光。普遍照此佛世界。已。東方過於十千佛土。普遍照彼寶主世界。時寶主世界菩薩摩訶

薩見此光已白寶相佛言世尊是何光相有
此光明遍照此界如是問已寶相佛告諸菩
薩言善男子西方去此十千佛土有國名娑
婆其中有佛号釋迦牟尼如來應供正遍覺
現在說法彼如來放毫釐一光是光通徹十
千佛土來照此界是諸菩薩白佛言世尊以
何緣故彼釋迦牟尼如來應正遍覺放毫釐
一光時佛報言彼釋迦牟尼如來國有無量
千億菩薩皆悉集會及釋梵護世一切四衆
欲見文殊師利童子從其聞法以是緣故請
彼釋迦牟尼如來放毫釐一光時寶相佛告
文殊師利汝今可往娑婆世界釋迦如來應

正遍覺喜欲見汝及諸大衆欲見聞法文殊
師利白彼世尊我今亦知如是光瑞時文殊
師利法王之子與十千菩薩俱頭面敬禮寶
相佛足譬如壯士屈伸臂頌與十千菩薩沒
寶主界到娑婆界住虛空中而不現形兩種
種華以供如來普及大衆積至於膝雜色妙
好色香適意一切大衆見雨此華白世尊言
是何光相大雨此華佛告諸善男子是文殊
師利法王之子與十千菩薩俱來到此娑婆
世界住虛空中而不現形雨華供我時諸大
衆俱共同聲白世尊言我等欲見文殊師利
法王之子及諸菩薩摩訶薩觀其形容時文

殊師利及十千菩薩從空而下頂禮佛足右
遶已畢各以神力化作座已却坐一百四時寂
調伏音天子白世尊言願聞文殊師利法王
之子建立言論衆所欲聞佛告天子汝今自
問文殊師利法王子隨汝所疑是時寂調伏
音天子問文殊師利彼寶相佛土云何說法
汝樂於彼文殊師利報言天子不生貪欲不
滅貪欲不生瞋恚不滅瞋恚不生愚癡不滅
愚癡不生煩惱不滅煩惱何以故無生之法
終無有滅天子問言云何文殊師利彼土衆
生不生貪瞋愚癡煩惱又不滅耶文殊荅言
不也天子天子問言彼佛說法爲何所斷荅

言爲不生不滅而演說法何以故彼佛刹土
不知斷不修證彼諸衆生重第一義非重世
諦義天子問言文殊師利云何名爲第一義
諦文殊師利言天子彼不住生又不住滅無
有處相非無處相非一相非無相非相非虛
空色相非可相非不可相非盡可盡無盡無
有能盡如是說名第一義諦天子義者非心
非心相續非言說句無此無彼亦無中間如
是說名第一義諦天子又復義者而不可得
無文字行是名第一義何以故佛說一切所
有音聲皆是虛妄天子言文殊師利如來所
說可虛妄耶天子如來所說無實無虛妄何

以故如來無二相無住心無言說非有爲法
非無爲法非說實非說虛無二相天子於意
云何如來化人若有所說爲實爲虛妄荅言
非實非虛妄何以故如來化人無有實故文
殊師利言如是如是天子一切諸法無成就
者如來所說無實無虛妄故名無二天子言
文殊師利云何如來說第一義諦文殊師利
言天子無有能說第一義諦者何以故是無
言說無能說者說是法時五百比丘不受諸
法漏盡心得解脫二百天子逮得於法忍尔
時寂調伏音天子問文殊師利第一義諦甚
爲難解文殊師利言如是如是天子第一義

諦實爲難解不正修行者實爲難得天子問言
文殊師利云何菩薩名不正修行文殊師利言
若不說言知是斷是修是證是何以故若有相
者是貪是著是戲論若有說言是應知應斷應
修應證是不名爲正修行也天子問言文殊師
利云何菩薩正修行也天子如如等法界等五
逆等如法界等諸見亦等如凡夫法等學法
亦等無學法等如聲聞法等緣覺法等菩薩
法等佛法亦等如生死法等涅槃法等煩惱
亦等諍訟亦等天子問言文殊師利云何諍
訟等煩惱亦等文殊師利言空故等無相故
等無願故等何以故空無分異故天子如寶

器空泥器空其中空界等無有異無有種種
以無二故如是天子如煩惱空及諍訟空無
有別異等無有二天子言文殊師利菩薩頗
修於聖諦不文殊師利言天子若其菩薩不
修聖諦云何能為聲聞說法又復天子菩薩
修聖諦有觀聲聞修聖諦不觀菩薩修聖諦
有閑聲聞無閑菩薩修聖諦有緣聲聞無緣
菩薩修聖諦而正觀之不證實際菩薩修聖
諦有善方便不背生死向於涅槃菩薩修聖
諦觀一切佛法天子譬如有人捨大伴主獨
一無侶欲過曠路心甚驚怖不敢復還如是
天子聲聞亦亦怖畏生死不還世間捨一切

衆生不還生死不觀佛法無善方便獨一無
二修行聖諦天子如大伴主多諸眷屬多諸
財產資糧豐饒大獲生利欲過曠路天子菩
薩如是爲大伴主多諸眷屬成大法利多法
資糧具足六波羅蜜成四攝法普悉觀緣一
切衆生觀生死迴流正觀佛法從於佛土至
於佛土具善方便修於聖諦天子如疏薄物
若以瞻婆須曼婆師華所熏之香香氣速出
如是天子聲聞修諦速疾如是不滿所願中
入涅槃彼亦不出於佛戒聞定慧解脫解脫
知見功德之香又亦不能斷煩惱習天子如
逝尸衣若以天寶沉水香熏經百千年清淨

美香人天敬重如是天子菩薩百千萬億劫
中常修聖諦不中入涅槃欲滿本願出佛戒
聞定慧解脫解脫知見功德之香能斷結習
為諸人天阿修羅軋闍婆等之所敬重寂調
伏音天子又問文殊師利彼寶相如來應正
遍覺是佛國土諸聲聞眾為何如也汝樂於
彼文殊師利言天子彼土聲聞不住於信不
教他信不護法界非八人出過八邪非須陀
洎出過惡道非斯陀含往來教化一切眾生
非阿那含一切諸法無來去故非阿羅漢受
於一切三千界供亦非聲聞能持一切佛所
說法不斷於欲不為欲熱不斷於瞋不為瞋

熱不斷於癡不為癡熱於一切法離諸闇障
不斷煩惱勤行精進斷於一切衆生煩惱永
無有生過一切生隨心欲生無有我人衆生
之相而教化衆生無取無與一切衆生清淨
福田無思無念而修正念不生不滅而修正
斷遠離身心而出生神足知於一切衆生諸
根到於彼岸而修行根摧一切結而修於力
遍知一切而修於覺得於無為不證於道到
於實際而住於定至於法界而修於慧盡於
無明而生於明無有二行而證解脫肉眼悉
見一切衆生一切佛國一切諸佛天眼悉見
一切衆生死此生彼慧眼觀見一切衆生生

死無來無去法眼見於諸法平等佛眼明見一切佛界天耳悉聞一切佛法能受能持一心能知一切衆生所有心行悉知宿命過去際劫百千萬億神通能過無量佛刹煩惱悉盡不證解脫雖復可見然非色身雖有言說無有文字雖有思念而心無動形色尊妙衆

相莊嚴功德纓絡威德難當名聞高遠淨戒塗香世法不汙煩惱不染無麁惡言遊戲神通多聞增廣辯才震吼善知變化調伏闍真大慧明照所說無滯揔持究竟常爲諸佛之所護念聲聞所念常恒專念菩提之道其念如海定如須弥忍如大地勇健降魔猶如帝

釋無能輕者寂靜如梵無有等等猶如虛空
遍入一切天子彼寶相佛土聲聞如是所有
功德復過於此說是法時於此會中五百比
丘五百比丘五百優婆塞五百優婆夷五
千天子向聲聞智說如是言世尊我等願為
彼寶相如來作聲聞衆文殊師利言善男子
非聲聞心能生彼土汝等可發無上道心得
生彼土諸生彼者皆是發阿耨多羅三藐三
菩提心尔時是等即發無上正真道心如來
悉記當生彼土

尔時寂調伏音天子問文殊師利云何名為
菩薩毗尼云何名為聲聞毗尼文殊師利言

天子怖畏三界毗尼是聲聞毗尼受無量生
死欲化一切諸衆生等生於三界毗尼是菩
薩毗尼輕毀功德莊嚴毗尼是聲聞毗尼自
集功德莊嚴毗尼是菩薩毗尼自斷一切諸
煩惱結是聲聞毗尼欲斷一切衆生煩惱是
菩薩毗尼不念成熟一切衆生一切佛法是
聲聞毗尼念欲成熟一切衆生一切佛法是
菩薩毗尼非爲一切諸天所識是聲聞毗尼
一切三千大千世界諸天識知是菩薩毗尼
一切魔捨是聲聞毗尼一切三千大千世界
諸魔嗔哭一切衆魔生於怨憎生摧伏相是
菩薩毗尼惟獨照明是聲聞毗尼普欲照明

一切世間欲照明成就一切佛法是菩薩毗
及自觀之心是聲聞毗及觀一切佛法是菩
薩毗及漸次毗及是聲聞毗及一念悉知是
菩薩毗及斷三寶種是聲聞毗及持三寶種
是菩薩毗及如破瓦礫不可修補是聲聞毗
及如金銀器破還可修治是菩薩毗及無善
方便是聲聞毗及成就方便是菩薩毗及無
有十力四無所畏是聲聞毗及成就十力四
無所畏是菩薩毗及少水果樹是聲聞毗及
園林堂閣法樂可樂是菩薩毗及無六波羅
蜜無四攝法是聲聞毗及有六波羅蜜具四
攝法是菩薩毗及不斷一切習是聲聞毗及

滅一切習是菩薩毗及又復天子略說有限
所攝有少法功德有少戒聞定慧解脫解脫
知見是聲聞毗及無量無量所攝無量功德
無量戒聞定慧解脫知見是菩薩毗及
尔時世尊讚文殊師利善哉善哉文殊師利
汝快說此菩薩毗及文殊師利聽吾少說成
滿汝義文殊師利譬如二人一讚大海二歎
牛跡文殊師利於意云何是人能讚是牛跡
中幾所功德文殊師利白言世尊大海無量
牛跡甚少當何所讚佛言如是知聲聞毗及
猶如牛跡小無功德無可讚歎聲聞乘人亦
復如是文殊師利於意云何彼第二人能讚

夫海功德不也文殊師利言世尊而是大海
有無量功德無量可歎佛言當知菩薩毗尼
亦復如是譬如大海無量功德無量可歎當
知大乘亦復如是說是法時万二千天子發
阿耨多羅三藐三菩提心而說是言世尊我
等亦當修學如此菩薩毗尼調伏無量一切

衆生時寂調伏音天子問文殊師利汝今修
學何等毗尼聲聞毗尼緣覺毗尼菩薩毗尼
文殊師利言天子於意云何頗有大海不納
衆水天子荅言文殊師利無有大海不納衆
水文殊師利言如是天子菩薩毗尼猶如大
海所有毗尼無不納受所謂聲聞毗尼緣覺

毗且菩薩毗且一切毗且天子言文殊師利
所言毗且毗且者爲何等義文殊師利言天
子毗且毗且者調伏煩惱爲知煩惱故名毗
且天子言文殊師利去何當修調伏煩惱去
何知煩惱文殊師利言若自妄想若他妄想
自他妄想不正憶念自想他想顛倒不實諸
見所縛無明爲首如是則能發生煩惱若不
自妄想不他妄想不自他妄想專正憶念不
自想他想斷於顛倒不住諸見除去無明不
行二行如是則便不起煩惱煩惱不起是畢
竟毗且天子是名畢竟毗且若以聖智知於
煩惱虛妄詐僞是無所有無主無我無所繫

屬無來處去處無方非無方非內非外非中
可得無聚無積無形無色如是名為知於煩
惱天子如人知於毒蛇種性能寂彼毒如是
若知結使種性能寂煩惱天子問言云何名
為煩惱種性文殊師利言妄想是煩惱種若
不妄想則便不起若其不起則非煩惱若無
煩惱則無窟宅若無窟宅則無所燒亦不所
住若無所住名畢竟毗如是名為知煩惱
種性天子問言云何文殊師利是調伏煩惱
為實為不實文殊師利言天子如人夢為毒
蛇所螫以苦痛故服於毒藥蛇毒消除苦痛
便瘥天子於意云何如彼人者為蛇所螫為

實不實天子答言文殊師利此是不實無有
實故當除何毒文殊師利言毒蛇不實除亦
不實應如是知諸聖毗尼亦復如是天子汝
作是言云何是調伏煩惱爲實爲不實天子
若我無我煩惱無煩惱若我無實者煩惱亦無
實是中若我無我煩惱無煩惱都不可得若如
是者當何調伏何以故天子一切法寂以無
生故一切法寂不可取故一切法寂無形相
故一切法盡無所有故一切法無盡以無生故
一切法無生無所有故一切法無滅無有堅實
故一切法無作無作者故一切法無作無有
我故一切法無我以無主故一切法無主如

虛空故一切法無來以無體故一切法無去
以無際故一切法無住無住處故一切法無
住無生滅故一切法無爲以無漏故天子一
切法無與畢竟調伏故

尔時寂調伏音天子復問文殊師利一切諸
法以何爲門文殊師利言不正修門增生死
故正修行門獲涅槃故正修行門得自在故
不正修門不得自在故疑惑門閻障礙故達
解脫門無閻障故妄想門增煩惱故無妄想
門得解脫故無識門無結使故覺門多事務
故寂門一切寂靜故見門增憍慢故空門滅
憍慢故惡知識門生諸惡法故善知識門生諸

善法故邪見門生諸苦本故正見門生諸善
本故慳惜門貧窮故布施門大財封故毀戒
門諸惡道故持戒門諸善處故諍訟門障諸
法故忍辱門增勝法故懈怠門令心垢故精
進門心無垢故覺觀門及亂鬧故禪定門心
一處故無智慧門如癡羊故智慧門三十七
助道分故慈門不障知故悲門質直無虛偽
故喜門集法寶故捨門離愛憎故正念門不
失本善根故正斷門修正行故神足門身心
輕故根門信爲首故力門摧伏一切諸煩惱
故覺門順覺諸法故八聖道門出過一切諸
非道故

復次天子善提心門一切佛法故攝一切法
門於一切法得自在故攝衆生門演說法故
善方便門處非處故慧度門到於一切衆生
心行之彼岸故六波羅蜜門大乘故六神通
門慧光明故法施忍門不隨他智故天子又
問文殊師利何等為法界門文殊師利言天
子普遍門是法界門天子言何界是法界文
殊師利言一切衆生界是法界天子言文殊
師利法界有邊際不荅言天子於意云何虛
空有邊際不不也文殊師利言天子猶如虛
空無有邊際法界亦無有邊際天子言文
殊師利汝知法界耶荅言天子法界不知法

界天子言文殊師利汝知何法有如是辯答
言天子於意云何響知何法而出音響天子
言響無所知而出音聲以因緣故而有音聲
如是天子菩薩緣衆生故而有所說天子言
汝任何處能有所說答言天子猶如如來化
人所住而有所說我住亦尔天子言如來化
人無有住處答言天子如來化人無所住而
有所說一切諸法亦無所住而有所說天子
言文殊師利若一切法無住汝任何處成無
上道文殊師利言天子我住無間成無上道
天子言無間爲任何處答言無間住無根本
天子言文殊師利住無間者必墮地獄答言

天子如是如是如來所說造五無間必墮地
獄天子我今亦住於五無間天子菩薩住五
無間成無上道何等爲五菩薩摩訶薩從初
發心求無上道中間不墮聲聞緣覺地是初
無間我應救濟一切衆生中間無懈是二無
間捨一切物中間無慳是三無間知諸法無
生中間不與諸見共住是四無間若知若見
若斷平等正覺以一念相應慧而覺知之中
間不起必成正覺是五無間若菩薩住是五
無間成阿耨多羅三藐三菩提天子言文殊
師利頗有凡夫住五無間墮於地獄菩薩亦
住此五無間成於無上正真道耶荅言有天

子言以何因緣故。答言天子一切法空。解於空故名得菩提。一切諸法無相無願非有爲。無生無起。因緣生覺。是因緣故名覺菩提。天子言文殊師利。誰信此法。答言天子若佛如來尚不生信。況復聲聞天子。又問誰解是法。答言不行我相者。又問誰信是法。答言不住此彼岸者。天子言若不住此。彼誰想是法。答言於一切法無憶想者。又問誰持。答言不持一切結。使者持天子。又問此經當至何等人手。答言至與一切衆生法者之手。又問彼何形色。答言天子彼有法色。非陰界入色。又問彼有何行。答言彼有空行。無相行。無願行。又

問彼趣何處。答言：天子，彼當趣於一切至處。到於一切衆生心行至無所至。天子問言：文殊師利菩薩退不？答言：天子，若菩薩退，阿耨多羅三藐三菩提無有是處。天子言：誰爲退者？答言：一切諸煩惱退，一切聲聞緣覺地退。又問：誰是不退？答言：三昧等者是無有退失。

天子言：文殊師利，何等爲三昧？答言：無二無別異。天子言：文殊師利，若一切法無有別異，誰爲別異？答言：天子，不知一切法平等者，分別爲二。彼行二行，墮於二行。若知平等，不行別異。若知平等，天子又問：文殊師利，頗有菩薩具於煩惱成菩提耶？答言：有。天

子又問是誰答言天子若菩薩斷結使是聲
聞若菩薩知一切衆生煩惱結使大悲增盛
發於無上正真道心是有菩提天子問言頗
有慳悋成檀波羅蜜耶答言有問言是誰答
言天子若菩薩不捨菩提之心攝護衆生如
是慳悋是檀波羅蜜天子又問頗有毀戒名
尸波羅蜜耶答言有問言是誰答言天子若
菩薩多益一切衆生不自觀戒如是毀戒名
尸波羅蜜文殊師利頗有菩薩捨於堪忍名
忍波羅蜜耶答言有問言是誰答曰天子若
菩薩捨外道禁戒堅任佛戒是名羸提波羅
蜜文殊師利頗有懈怠成精進波羅蜜耶答

言有問言是誰答言天子若菩薩於聲聞緣
覺地生於懈怠勤加修習無上正道是名毗
梨耶波羅蜜文殊師利頗有不定心名禪波
羅蜜耶答言有問言是誰答言天子菩薩夢
中不生聲聞緣覺地心是菩薩不定心是名
禪波羅蜜文殊師利頗有無慧名菩薩般若
波羅蜜耶答言有問言是誰答言天子謂無
慧者而是菩薩不作一切世間盡道諸惡呪
術厭鎮顛狂若於一切衆生法慧是菩薩成
就具一切智是名般若波羅蜜于時世尊讚
文殊師利善哉善哉文殊師利善說菩薩應
作不應作汝如是說文殊師利聽吾少說文

殊師利如人飢羸寧忍飢苦終不服於雜毒
之食菩薩如是寧慳貪毀戒瞋諍懈怠亂心
妄念愚無智慧不住聲聞緣覺地中正念施
戒忍進禪慧何以故菩薩於中應生怖畏天
子問佛菩薩不怖畏結使耶佛言應怖天子
但菩薩於聲聞地中倍應生怖天子於意云
何如人護命為畏斬頭不畏斬手足天子白
佛彼畏斬頭不畏斬手足何以故世尊人斬
手足能修福業以是因緣得生天上世尊若
人斬頭失於壽命不修德行佛言如是天子
菩薩寧當毀犯禁戒終不捨於一切智心寧
為菩薩具諸煩惱終不作於漏盡羅漢天子

歎曰希有世尊是菩薩所行勝餘世間世尊
諸聲聞持戒勤加精進即是菩薩毀禁懈怠
佛言如是如是如汝所說天子如貧人食是
轉輪王毒如是天子聲聞勤進斷諸煩惱尚
不安樂閻浮衆生況復一切諸衆生也天子
如大賈主多財封邑大捨勤進多所利安多
所養育菩薩如是行大慈悲於一切衆生興
起大悲修行精進養育無量一切衆生令得
世間出世間樂是時長老迦葉白世尊言
諸聲聞人證無爲法菩薩惟得有爲之法云
何有爲菩薩勝無爲聲聞佛言迦葉我今爲
喻諸有智者因是得解迦葉譬如有入破

一毛以爲百分是人復以此一分毛點滿
大海中之蘇迦葉於意云何是人毛分取四
海蘇能作是念我所取多非海中者迦葉白
言不也世尊佛言迦葉汝意云何於此二分
何者爲勝何者爲大何者爲多何者大價迦
葉白言假使令取千億由旬餘者猶勝猶大
猶多有於大價況以毛分惟取一滴佛言迦
葉如毛百分以一分毛取一點蘇聲聞所有
無爲智慧亦復如是佛智所知迦葉如滿四
大海中之蘇菩薩有爲善根功德亦復如是
用以迴向無爲智故迦葉譬如蟻子含持一
粒猶如秋月成熟穀滿大地迦葉於意云何

何者爲勝世尊秋月成熟穀滿大地有無量
穀救濟養育無量衆生以爲資糧世尊蟻持
一粒無所利安迦葉蟻持一粒如諸聲聞解
脫之果亦復如是如秋穀成熟滿於大地當
知菩薩六波羅蜜四攝之法善根功德亦復
如是成熟養活無量衆生安置世樂出世間
樂及涅槃樂迦葉如有百千水精珠擔而來
入城若一無價瑠璃寶珠置之船上若其安
隱達閻浮提救護一切貧窮困苦迦葉於意
云何是百千擔水精入城是無價寶一瑠璃
珠可爲比不不也世尊迦葉是百千擔諸水
精珠來入城者喻於聲聞無爲功德亦復如

是如一無價寶瑠璃珠船上安隱至闍將提
多所安樂菩薩如是不断三寶種發於一切
智寶之心多所安樂時大迦葉白世尊言未
曾有也如來善說諸菩薩等發於一切智寶
之心出過一切聲聞緣覺今時寶主世界諸
菩薩與文殊師利來者聞說是已白世尊言
一切言說皆是戲論是差別說呵責結使說
世尊寶相佛土無有是說純明菩薩不退轉
說無差別說世尊難有釋迦牟尼如來應正
遍覺能忍是苦得一切法無有差別無上中
下一味法性安置三乘是諸菩薩即以天華
散供佛上語文殊師利我等可還寶在界

文殊師利言汝等可去宜知是時諸菩薩言
汝不去耶文殊師利言善男子一切世界皆
悉平等一切佛等一切法等一切衆生等我
住於彼何所爲作諸菩薩言以何事故一切
世界等一切佛等一切法等一切衆生等文
殊師利言諸善男子一切刹土如虛空故等
諸佛法界不思議故等一切諸法虛僞故等
一切衆生無我故等以是義故我如是說一
切世界等乃至一切諸衆生等時文殊師利現
神通力以神通力故令娑婆世界如寶王界
等無差別令世尊釋迦牟尼如寶相如來等
無差別彼諸菩薩各作是念我等已到寶王

世界於釋迦牟尼佛生寶相佛想即向佛言
誰使我等來至此土佛言誰將汝去諸菩薩
言文殊師利童子將我等去佛言彼將汝來
尔時文殊師利語諸菩薩善男子汝等各各
入定觀之誰將汝來誰將汝去時諸菩薩各
入定觀各作念言我等不動娑婆世界去我
等自謂至寶主世界尊未曾有也文殊師利
神通力三昧之力使我等謂到寶主界猶故
不動是娑婆世界尊願令一切衆生悉得如
是神力如文殊師利尔時佛告寶主世界諸
來菩薩善男子等如金器銀器玻璃器
器水精器鐵器金剛器栴檀器寶器石器木

器其中空界器雖種種其空無異如是一法
性一如一實際然諸衆生種種形相各取生
處彼自體變百千億種形色別異諸地獄色
畜生色餓鬼色天色人色聲聞色緣覺色菩
薩色佛色以平等故色等如如等故色等空
等故色等善男子文殊師利以是事故說
一切世界等乃至一切衆生等是故說言我今
不住

是時世尊以如是法示教利喜諸菩薩已頭
面禮足遶佛三匝出衆不遠沒娑婆界任寶
主界是時佛告阿難汝受此經持讀誦說於
大衆中爲大廣說大德阿難白世尊言我且

受持世尊何名斯經云何受持佛告阿難此
經名寂調伏音天子所問亦名清淨毗尼亦
名一切佛法佛說是經已大德阿難寂調伏
音天子文殊師利等一切菩薩大迦葉等一
切聲聞聞佛所說皆大歡喜

清淨毗尼經

四

作

嗥哭

上正作
號音毫

瓦

磔

下音
塵

蠱道

上古音

厭鎮

上一實

傷音

析析

先擊
反

